



Rua. Mascarenhas, Aldeia 04, Suku Mascarenhas, Postu Vera Cruz, Dili, Timor-Leste
Tel: (+670) 7739-2101 / 7662-8663 / N°. Reg. 314 / Po Box: 0044 / Website: www.adtl.tl

EJIJÉNSI ORSAMENTU JERAL ESTADU (OJE) 2021 SENSIVEL BA ASUNTU DEFISIÉNSIA IHA TIMOR-LESTE

HOSI ORGANIZASAUN SIRA NE'EBÉ SERBISU NO TAU MATAN BA EMA HO DEFISIÉNSIA IHA TIMOR-LESTE

INTRODUSAUN

Ema ho defisiénsia (EhD) mak grupu ida ne'ebé vulneravel liu iha sosiedade. Sira nia vulnerabilidade ne'e kauza hosi prosesu konstrusaun sosiál ida ne'ebé maioria afeta hosi kiak, diskriminasaun, tratamentu aat no abandonadu no seluk tan.

Ema ho defisiénsia sira-nia nesesidade dezenvolve bazea ba nia tipu defisiénsia hanesan:

- Ema ho defisiénsia tilun nesesita terapia ko'alía, lian jestual ho klinika audiologia.
- Ema ho defisiénsia matan nesesita kursu letra Braille ho ekipamentu ba mobilidade nian.
- Ema ho defisiénsia Psiko-sosiál nesesita terapia fiziku, psikolojia ho counseling.
- Ema ho defisiénsia fiziku nesesita asesibilidade no formasaun sira relevante.

Hotu-hotu nesesita edukasaun, saude, asesu ba justisa, formasaun, empregu no oportunidade hodi dezenvolve an iha area ekonomia, disportu, arte e kultura. Liutan ida ne'e, organizasaun sira ne'ebé serbisu ba ema ho defisiénsia presiza apoiu governu nian, liuliu fundus no fatin (espasu) atu sira bele hala'o sira nia misaun ho di'ak.

Rejultadu Sensus 2015 hatudu katak ema ho defisiénsia iha Timor-Leste hamutuk nain 38.118 habitantes, kompostu hosi defisiénsia matan nain 14.828, defisiénsia tilun (la bele rona no koalia) nain-12.511, defisiénsia motora nain-7.466 no defisiénsia psiko-sosial nain-3.313. Sensu la separa ema ho defisiénsia psiko-sosiál no defisiénsia intelektual.

Tinan-tinan Governu Timor-Leste aprova Orsamentu Jerál Estadu (OJE) ba desenvolvimentu iha Timor-Leste ba sustentabilidade hodi hadia povu nia moris. Povu ne'e inklui sidadaun ne'ebé ho defisiénsia ne'ebé hola parte iha estadu ida ne'e. Governu Timor-Leste tenki sura mos partispasaun ema ho defisiénsia iha dezenvolvimento hanesan ho lema Objetivu Desenvolvimentu Sustentabel 2011-2030 katak "Laiha ema ida mak husi hela iha kotuk". Governu Timor-Leste mos iha kna'ar no responsabilidade hodi promove direitu ema ho defisiénsia tuir lei haruka.

TAMBA SÁ AMI HATO’O EIJENSIA:

Ami rekonhese katak Estadu no Governu Timor-Leste kompremitidu ba politika ida universal no igual ba sidadaun hotu-hotu inklui sidadaun ho defisiénsia.

Konstituisaun RDTL Artigu 21 ne’ebé koalia kona-ba “Sidadaun ne’ebé iha defisiénsia” katak estadu valorija direitu sidadaun ne’ebé mak ho defisiénsia no bele promove direitu sidadaun ho kondisaun defisiénsia tuir Lei haruka.

Governu Timor-Leste intrudus ona programa, planu no politika oinoin hodi responde ba nesesidade garante direitu ema ho defisiénsia nian liu-hosi linhas ministerial relevante sira. Programa, planu no politika hirak ne’e mak hanesan: Politika nacionál inkluziun no promosaun direitu ema ho defisiénsia 2012, Planu asaun nacionál ba direitu ema ho defisiénsia 2014-2018, Politika nacionál edukasaun inkluzivu, Estratéjia nacionál ba saude mental, aprova dekreitu lei nú. 19/2008 kona-ba subsidiu sosiál, programa apoiu institusionál no seluk tan. Esforsu hirak ne’ebé hala’o ona ami nota katak nia implementasaun seidauk masimu.

Komunidade defisiénsia no organizasaun hirak ne’ebé serbisu no tau matan ba ema ho defisiénsia preokupa tebes ho implementasaun hosi politika hirak ne’e. Presisa orsamentu espesífiku ba programa defisiénsia mós ba inkluziun asuntu defisiénsia iha setór hotu-hotu atu implementa governu nia política no planu sira iha realidade.

OBJETIVU PETISAUN

Objetivu prinsipal hosi ejijensia konjunta ida ne’e mak:

1. Atu hato’o lamentasaun sira kona-ba Ema ho Defisiénsia ne’ebé Governu la-tau prioridade hanesan Ezekusaun Orsamentu Geral do Estadu (OGE), La tau prioridade espesífiku ba asuntu Jéneru,
2. La halo tuir Kompromisu sira ligadu ho assuntu Defisiénsia nomos la deskreve planu no politika ne’ebé liga ho assuntu inkluziun ba EhD iha Timor Leste

EIJENSIA BA ASUNTU DEFISIÉNSIA

Eijensia konjunta hosi organizasaun sira ne’ebé serbisu no tau matan ema ho defisiénsia iha Timor-Leste, hanesan tuir mai ne’e:

Ba Ex^{mo} Primeiru Ministeriu:

Husu ba Governu Da-8 Konstituisional hodi halais prosesu Ratifikasiun ba Konvensaun ONU ba Direitu Ema ho Defisiénsia /UN convention on the right of persons with disability no estabelese Konsellu Nasional ba Ema ho Defisiénsia, ne’ebé mak iha ona ezbosu dekretu lei husi Ministériu Solidaridade Sosiál e Inkluziun ne’ebé pendent hela iha governasaun anterior,

Ba Parlamentu Nasionál

Husu ba distintas/os deputadu/a Oitavu Lejislatura atu prevé ejijénsia hanesan tuir mai ne’e; orsamentu Jerál Estadu pelumenus 10 pursentu, halo verifikasiun ida klean ba planu, programa no orsamentu 2021, kria lei espesífiku ba Ema ho Defisiénsia bazeia ba Lei Ihan Konstituisaun Repúblika Demokrátika Timor-Leste Artigu 21 ho kapitulo balun ne’ebé mak refere ba Ema ho Defisiénsia; fiskalizasaun ba projeitu governu nian tenke garante ba asesibilidade ba ema ho defisiénsia.

Ba Ex^{mo} Prezidente da Repúblika

Husu ba Sr. Prezidente wainhira promulga lei, Programa Governu liga ba OGE tenki hare'e mós ba leis, artigus no Kapitulus balun ne'ebé pelumenus temin Ema ho Defisiénsia.

Ba Ministériu Solidaridade Sosiál e Inklusaun (MSSI)

Husu ba Ministériu Solidariedade Sosiál e Inklusaun atu halais no hahú implementa ona PAN 2020-2024, ba Ema ho Defisiénsia no kontinua estabelese konsellu nasionál ba direitu ema ho defisiénsia hodi bele hetan aprovasaun husi Konsellu Ministru.

Ba Ministériu Edukasaun Joventude e Desporto

Husu Ba Ministériu Edukasaun Joventude no Desporto atu bele haree planu asaun nasionál ba política nasionál edukasaun, dezenvolve lian jetual nasionál Timor-Leste nian; re-integra ba eskola públiku sira, liliu tipu defisiénsia matan no tilun.

Ministériu Obras Públiku no AND

Husu Ba Ministériu Obras Públiku no ADN presiza tau atensaun ba Dezeňu Infraestrutura hanesan trotoar, ponte, harriis fatin, jardin no edifisiu públiku sira hanesan eskola, hospital, tribunal, husu ba kompania Privadu sira, projektu dezenvolvimentu rural, projektu ki'ik no mós projektu bo'ot hotu hodi asegura asesibilidade ba Ema Ho Defisiénsia, atu tau sinais transito ida ho lian hodi asegura ema ho defisiénsia matan bele ultrapasa Estrada.

Ba Ministériu Saúde

Husu Ba Ministériu Saude halo estratéjia ne'ebé ho inkluzivu no efektivu ba Ema ho problema Saude Mentál tuir Lei Ministériu Saude ne'ebé mak iha ona nomos kria fatin ne'ebé seguru iha Munisipiu hotu hodi asegura seguransa ba Ema ho defisiénsia Physiko- Sosiál sira.

Ba Ministériu Públiku no Justisa

1. Husu atu Ministériu Justisa integra mós asuntu defisiénsia iha Kurríkulu formasaun Judisiariu nian hodi fó formasaun ba Juís no Defensór sira hotu wainhira halo julgamentu ba ema ho defisiénsia ne'ebé mak iha prosesu Justisa Formál.
2. Husu ba Juís no Defensór Tribunal sira hodi valoriza ema ho defisiénsia nia direitu
3. Husu atu juís sira wainhira iha prosesu julgamentu ba kazu ema ho defisiénsia presiza uza maneira komunikasaun diferente no lian ne'ebé natural no labele uza ternus tekniko judisiariu nian barak (ko'alia ho lian simples atu sira bele kompriende)
4. Husu atu Ministériu Justisa atu rekruta ema ida hodi halo tradusaun Lian Jestual iha tribunal
5. Husu atu tau fatin razoavél ba atende kazu ema ho defisiénsia ho tipu oioin.
6. Husu Ministériu Justisa atu kria fatin ne'ebé assesivel atu ema ho defisiénsia hodi asesu ho livre.

Sekretáriu Estadu Komunikasaun Sosiál (SEKOMS)

1. Husu atu fó formasaun ba jornalista, editor no redasaun sira kona-ba asuntu defisiénsia.
2. Husu atu SEKOMS kria regulamentu ida regor ba media hotu iha Timor-Leste atu utiliza terminoloxia ida di'ak ba ema ho defisiénsia.

Sekretáriu Estadu Joventude no Desportu (SEJD)

1. Husu atu buka meius oinoin hodi kapasita no promove atleta ho defisiénsia iha área remotas.
2. Husu atu suporta finanseiru ba Komité Nasional Paralímpiku no Olímpiku Espesiál no fó asisténsia ba ema ho defisiénsia atu partisipa iha eventu desportu internasional.
3. Husu atu kria kampu ida inkluzivu hodi konsidera partisipasaun masimu ema ho defisiénsia nian.

Ba Sekretáriu Estadu Formasaun Profisionál e Empregu (SEFOPE)

1. Husu atu involve ema ho defisiénsia iha formasaun profisionál sira.
2. Husu atu imediatamente halo studu avaliaasaun ida ba sentru formasaun sira hodi hare asuntu asesibilidade iha sentru formasaun no oinsá involve ema ho defisiénsia.

Ba Sekretáriu Estadu Igualdade no Inkluzau (SEII)

1. Polítika SEII nian atu protesaun no promove d'ak liu tan partisipasaun feto ho defisiénsia nia aspirasaun liu husi involve feto ho defisiénsia iha eventu nacional no internasional hotu feto nian.
2. Polítika SEII nian tenke tau atensaun aas ba feto ho defisiénsia iha liliu envolvimentu feto ho defisiénsia iha atividade hotu iha dezenvolvimentu nasional.
3. Husu ba SEII atu tau osan ba selebrasaun Loron Mundiál Ema ho Defisiénsia ne'ebé mak kada tinan hala'o iha 3 Dezembru.

Ba Sekretáriu Estadu Dezenvolvimento Koperativa

1. Husu atu nafatin apoiu koperativa kréditu defisiénsia no mós grupu negósiu defisiénsia ne'ebé eziste;
2. Husu atu introdús planu no programa prioridade sekretáriu estadu nian ba grupu defisiénsia sira;

Ba komisaun Funsau Pública

1. Husu ba Komisaun Funsau Pública atu iha Quota 1% ba ema ho defisiénsia iha rekrutamentu funsionáriu pública.
2. Husu komisaun funsaun pública atu dekreta lei ida kona-ba kriteriu ba prosesu rekrutamentu atu la bele diskrimina ema ho defisiénsia.

Ba entidade governante hotu:

1. Husu ba entidades governante hotu atu inklui no involve Ema ho Defisiénsia iha prosesu Dezenvolvimentu nasional hahú husi inísiu planeamentu to'o implementasaun no evaluasaun, nune'e bele rona Ema ho Defisiénsia sira nia lian ba dezenvolvimentu, inklui hola parte foti desizaun.

PROPOSITOR SIRA